

Գրանցված է

Հայաստանի Հանրապետության  
Կենտրոնական բանկում

Նախագահ՝ Արթուր Ջավադյան

---

« 29 » մարտ 2010թ.

**ՆԱՍԴԱՔ ՕԷՄԷՔՍ ԱՐՄԵՆԻԱ  
ԲԱՑ ԲԱԺՆԵՏԻՐԱԿԱՆ ԸՆԿԵՐՈՒԹՅՈՒՆ**

**ՎԱՐԿԱՅԻՆ ՌԵՍՈՒՐՍՆԵՐԻ  
ԱՌԵՎՏՐԻ ԿԱՆՈՆՆԵՐ**

## **Գլուխ 1. Հասկացություններ**

- 1) Սույն կանոններում կիրառվող հասկացություններն ունեն սույն գլխով սահմանված նշանակությունները:
- 2) **«Վարկային ռեսուրսների շուկայի մասնակից»**, այն բանկերը, որոնք Օպերատորի հետ ունեն առևտրին մասնակցության վերաբերյալ գործող պայմանագիր և որոնց Օպերատորի կանոններին համապատասխան թույլատրվել է մասնակցելու վարկային ռեսուրսներով Օպերատորի կողմից կազմակերպվող առևտրին:
- 3) **«Լոտ»**, վարկային ռեսուրսի գնման կամ վաճառքի հայտում նշվող՝ ՀՀ դրամով արտահայտված վարկային ռեսուրսի մեկ անվանական միավորին համարժեք քանակական չափման նվազագույն միավոր:
- 4) **«Մաքրեք»**, վարկային ռեսուրսի գնման (վաճառքի) լավագույն գնի նկատմամբ առևտրային համակարգ մուտքագրվող գնման (վաճառքի) հայտերի գների տարբերության առավելագույն թույլատրելի սահման:
- 5) Սույն կանոններում կիրառվող այլ հասկացություններն ունեն «Արժեթղթերի շուկայի մասին» ՀՀ օրենքով և Օպերատորի կանոններով սահմանված նշանակությունները:

## **Գլուխ 2. Վարկային պայմանագրի կնքումը**

- 1) Օպերատորի առևտրային համակարգում վարկային պայմանագրեր (վարկային ռեսուրսներով գործարքներ) կարող են կնքվել առևտրային և հետառևտրային մատաչրջանների ընթացքում՝ Օպերատորի «Առևտրի ընդհանուր կանոններով» և սույն գլխով սահմանված կարգով:
- 2) Օպերատորի վարկային ռեսուրսների շուկայում կնքվում են մեկ աշխատանքային օրանոց (օվերնայթ) վարկային պայմանագրեր, որոնց առևտուրը Օպերատորը կազմակերպում է երկկողմանի անընդհատ աճուրդի եղանակով:
- 3) Վարկային ռեսուրսներով կնքվող գործարքները դիլերային գործարքներ են և կարող են կնքվել միայն վարկային ռեսուրսների շուկայի մասնակցի անունից և հաշվին:
- 4) Օպերատորը վարկային ռեսուրսներով առևտուրը կազմակերպում է լրիվ նախնական դեպոնացման առևտրի նմանությամբ՝ սույն գլխի 5) - 8) կետերում սահմանված առանձնահատկություններով:
- 5) Վարկային ռեսուրսների գնման (վաճառքի) հայտերում որպես հայտի գին նշվում է ձեռքբերվող (տրամադրվող) վարկի տարեկան տոկոսադրույքը, որի հիման վրա վարկառուի կողմից վարկատուին վճարվելիք տոկոսագումարի չափը հաշվարկվում է  $C*Y*T/36500$  բանաձևով, որտեղ C-ն տրամադրվող վարկի գումարն է, Y-ը՝ վարկի տարեկան տոկոսադրույքը, իսկ T-ն՝ վարկի տրամադրման և մարման օրերի միջև ընկած օրացուցային օրերի քանակը: Տոկոսագումարը կլորացվում է 0.1 (զրո ամբողջ մեկ տասնորդական) ՀՀ դրամի ճշտությամբ:
- 6) Վարկային ռեսուրսների ձեռքբերման համար դրամային միջոցների դեպոնացում չի պահանջվում: Փոխարենը Օպերատորը վարկային ռեսուրսների շուկայի յուրաքանչյուր մասնակցի տրամադրում է վարկային ռեսուրսների ձեռքբերման հավասար պայմանական սահմանաչափեր՝ Օպերատորի գործադիր մարմնի ղեկավարի որոշմամբ սահմանված չափով:
- 7) Վարկային ռեսուրսների շուկայի մասնակիցների կողմից Օպերատորի «Վարկային ռեսուրսների քլիրինգի և վերջնահաշվարկի կանոններին» համապատասխան կատարված լրացուցիչ դեպոնացումների դեպքում համապատասխան չափով ավելացվում են դեպոնացված վարկային ռեսուրսների մնացորդները:
- 8) Առևտրի մասնակիցը կարող է իր տերմինալից (հեռացված տերմինալից) ամբողջությամբ կամ մասնակի ապադեպոնացնել վարկային ռեսուրսների շուկայի տվյալ մասնակցի դեպոնացված վարկային ռեսուրսների՝ առևտրային համակարգում տվյալ պահին առկա և ազատ (չարգելադրված) մնացորդը կամ դրա մի մասը, որի դեպքում ապադեպոնացված միջոցների չափով նվազեցվում է դեպոնացված համապատասխան ռեսուրսի մնացորդը: Առևտրի մասնակցի կողմից ապադեպոնացված միջոցների հետ կապված հետագա գործառնություններն իրականացվում են Օպերատորի «Վարկային ռեսուրսների քլիրինգի և վերջնահաշվարկի կանոններին» համապատասխան:

- 9) Առևտրային նստաշրջանի ընթացքում ներկայացվող՝ վարկային ռեսուրսի գնման (վաճառքի) հայտում գինը նշվում է ստորակետից հետո 2 (երկու) նիշի ճշտությամբ, իսկ լոտերի քանակը պետք է բազմապատիկ լինի տաս միլիոնին:
- 10) Առևտրային համակարգի կողմից չեն ընդունվում և առևտրային համակարգում չեն գրանցվում առևտրի մասնակցի կողմից ներկայացված՝ տաս միլիոնին ոչ բազմապատիկ թվով լոտեր պարունակող հայտերը, ինչպես նաև վարկային ռեսուրսների շուկայի տվյալ մասնակցի անունից ներկայացված հայտին վարկային ռեսուրսների շուկայի նույն մասնակցի անունից ներկայացվող համապատասխան հանդիպակաց հայտերը:
- 11) Տվյալ առևտրային նստաշրջանի ընթացքում չբավարարված հայտերը չեղյալ են համարվում և հետառևտրային նստաշրջանում չեն ընդգրկվում համապատասխան Հերթերում:
- 12) Հետառևտրային նստաշրջանի ընթացքում ներկայացվող հայտում նշվում են դրա բավարարման հետևյալ էական պայմանները՝
  - ա) վարկային ռեսուրսի հապավումը,
  - բ) հայտի տեսակը՝ գնման կամ վաճառքի,
  - գ) լոտերի քանակը,
  - դ) հայտի բավարարման ժամանակային պայմանը՝ պահել հերթում կամ հանել մնացորդը:
- 13) Հետառևտրային նստաշրջանի ընթացքում ներկայացվող բոլոր հայտերը մասնակի բավարարմամբ, անմիջապես ակտիվացվող և լիմիտային հայտեր են, որոնցում նշվող գինը հավասար է վարկային տվյալ ռեսուրսով տվյալ հետառևտրային նստաշրջանին նախորդած առևտրային նստաշրջանի ընթացքում կնքված բոլոր գործարքների միջին կշռված գնին: Եթե տվյալ հետառևտրային նստաշրջանին նախորդած առևտրային նստաշրջանի ընթացքում տվյալ վարկային ռեսուրսով գործարք չի կնքվել, ապա գործարք չի կարող կնքվել նաև տվյալ հետառևտրային նստաշրջանի ընթացքում:
- 14) Հետառևտրային նստաշրջանի ընթացքում առևտրի մասնակիցների կողմից առևտրային համակարգ մուտքագրված՝ նույն վարկային ռեսուրսի գնման և վաճառքի հայտերն ընդգրկվում են երկու առանձին Հերթերում՝ ըստ առևտրային համակարգում դրանց գրանցման ժամանակային առաջնահերթության:
- 15) Հետառևտրային նստաշրջանի ընթացքում առևտրի մասնակիցների կողմից առևտրային համակարգ մուտքագրվող ցանկացած հայտին Հերթում հանդիպակաց հայտի (հայտերի) առկայության դեպքում առևտրային համակարգում գրանցվում է վարկային գործարքի (գործարքների) կնքում:
- 16) Եթե հետառևտրային նստաշրջանի ընթացքում ներկայացված հայտն առևտրային համակարգ մուտքագրվելու պահին Հերթում առկա հանդիպակաց բոլոր հայտերով բավարարվելուց (գործարքների կնքումից) հետո այնուամենայնիվ բավարարվում է մասամբ, ապա մնացորդը (հայտի չբավարարված մասը) ընդգրկվում է Հերթում սույն գլխի 14) կետում նշված կարգով կամ չի ընդգրկվում Հերթում՝ կախված հայտի բավարարման ժամանակային պայմանից:
- 17) Եթե հետառևտրային նստաշրջանի ընթացքում ներկայացվող հայտին հանդիպակաց հայտեր Հերթում չկան, ապա այն ընդգրկվում է Հերթում սույն գլխի 14) կետում նշված կարգով կամ չի ընդգրկվում Հերթում՝ կախված հայտի բավարարման ժամանակային պայմանից:
- 18) Տվյալ հետառևտրային նստաշրջանի ընթացքում չբավարարված հայտերը չեղյալ են համարվում և հաջորդ առևտրային նստաշրջանում չեն ընդգրկվում համապատասխան Հերթերում:

### **Գլուխ 3. Վարկային ռեսուրսներով կնքված գործարքների կատարումը**

- 1) Վարկային ռեսուրսներով առևտրային համակարգում կնքված գործարքների արդյունքում ծագած՝ փոխադարձ պարտավորությունների և պահանջների որոշումը, հաշվանցումը, վճարահաշվարկային փաստաթղթերի պատրաստումն ու վերջնահաշվարկի կատարումն իրականացվում է գործարքի կնքման օրը, իսկ մարումը՝ գործարքների կնքման օրվան հաջորդող աշխատանքային օրը՝ Օպերատորի «Վարկային ռեսուրսների քլիրինգի և վերջնահաշվարկի կանոններով» սահմանված կարգով:
- 2) Վարկային ռեսուրսների շուկայի մասնակիցները, որոնց կազմում կամ անունից հանդես են գալիս գործարք կնքած առևտրի մասնակիցները, պարտավոր են Օպերատորին վճարել Օպերատորի «Սակագների մասին կանոններով» սահմանված համապատասխան միջնորդավճարները:

**Գլուխ 4. Կանոններում փոփոխությունները և լրացումները**

- 1) Սույն կանոններում փոփոխություններն ու լրացումները դրա անբաժանելի մասն են և ուժի մեջ են մտնում օրենքով սահմանված կարգով, եթե այլ բան սահմանված չէ սույն կանոններով:
- 2) Սույն կանոններն ուժի մեջ են մտնում ՀՀ կենտրոնական բանկում գրանցվելուց հետո՝ Օպերատորի գործադիր մարմնի ղեկավարի որոշմամբ սահմանված օրը՝ կանոնների դրույթների կիրարկումն ապահովող բոլոր փաստաթղթերի և պայմանագրերի ստորագրումից հետո:

**Հաստատված է**  
**«ՆԱՍԳԱԶ ՕԷՄԷԶՍ ԱՐՄԵՆԻԱ» ԲԲԸ**  
**ղիտորդ խորհրդի որոշմամբ**

\_\_\_\_\_ **Արմեն Մելիքյան**

**«16» նոյեմբերի 2009թ.**  
**ք. Երևան**  
**ՀՖԲ-01/118Լ**